

Regiuns metropolitanas èn privlusas per il Grischun

DA STEFAN ENGLER,
CUSSEGLIER GUVERNATIV

Dacurt è vegnida fundada l'uniun spazi metropolitan da Turitg. Otg chantuns (Turitg, Argovia, Lucerna, Sviz, Schaffusa, Son Gagl, Turgovia e Zug) sco er circa settanta citads e vischnancas èn s'unidas cun la finamira da concepir e da promover cuminaivlamain il svilup en ils quatter champs d'aziun «economia», «spazi da viver», «traffico» e «societad». Il medem han en mira ils chantuns da la Svizra franzosa (Friburg, Neuchâtel, Vallais, Vad e Genevra) ensemen cun il chantun Berna, numnadamain da s'unir ad in spazi economic omogen.

Talas «furmaziuns da blocs» tschantan differents dumondas: dumondas da la politica dal stadi, da la politica democratica e da la politica federalistica, oravant tut dentant er talas da l'influenza politica.

Tge muntan questas «furmaziuns da blocs» per chantuns sco il Grischun ch'èn exclus da quai? L'intent da las regiuns metropolitanas è quel da persequitar cuminaivlamain giavischs e svilups inter-



chantunals. Da cuntanscher in'unitad davart las finamiras ed ina plivalur per tuttas e per tuts na vegnan dentant betg ad esser uschè simpel.

Quant enavant che questa «furmaziun da blocs» contribuescha però ad avrir novs foss tranter la citad e la champagna, resta d'observar. Sche la defensivun dals interess ha però in success uschè grond ch'i po vegnir prendi influenza sin decisions da la confederaziun, alura po quai daventar «privlus» per quellas e per quels ch'èn exclus. I vegniss periclità l'equiliber entaifer noss pajais tranter ils chantuns urbans ed ils chantuns rurals ed uschia la finala la coesiun.

Sch'il territori da muntogna ed uschia er

noss chantun ha profità en il passà bleras giadas d'in «bonus rural», pudes quai sa midar en l'avegnir, sch'ils chantuns metropolitanas repartan la turta l'emprim tranter els.

Per il chantun Grischun e per la regenza sa tschenta la dumonda, co ch'el respectivamain co ch'ella duai ir enturn cun quai. Co essan nus buns – en vista a questa nova constellaziun da pussanza en la politica federala ed en l'administraziun federala – da cuntanscher ch'ils giavischs speziels dal territori da muntogna vegnian respectads?

Per pudair mantegnair l'influenza sin la politica federala e per betg vegnir splattitschà tranter ils trais blocs da pussanza che sa furman (vest, nordvest, Turitg), d'ovri il cuntrapis politic dals chantuns rurals. En cas da questa col-lavuraziun vegni a sa tractar en emprima lingia da mussar il niz, dentant er ils basegns dals territoris rurals per la coesiun da noss pajais. La premissa per quai è dentant ch'igl exista insumma ina strategia generala per il territori rural.